

**Perkasa desak Samad Said pulangkan anugerah Sasterawan Negara  
Malaysian Insider  
Sept 5 , 2013  
OLEH MD IZWAN**

Sasterawan Negara Datuk A. Samad Said digesa supaya memulangkan sendiri gelaran tersebut untuk membuktikan keikhlasannya, kata Datuk Ibrahim Ali.

Samad hari ini secara terbuka berkata mengalu-alukan sekiranya kerajaan mahu menarik balik gelaran Sasterawan Negara yang diterimanya.

"Saya puji keberanian A. Samad, kalau macam itu, saya gesa beliau sendiri yang pergi hantar balik gelaran Sasterawan Negara.

"Kalau beliau ikhlas, serahlah sendiri," kata Presiden Pertubuhan Pribumi Perkasa Kebangsaan (Perkasa) dalam satu sidang media di Kelab Sultan Sulaiman, Kuala Lumpur hari ini.

Ibrahim berkata sekiranya kerajaan mengambil langkah menarik balik, banyak pihak tidak bertanggungjawab akan mengecam tindakan tersebut.

"Nanti bila kerajaan lucutkan, kata macam-macam pula," katanya.

Semalam, Samad ditahan polis di rumahnya di Bangsar, kira-kira jam 12.40 pagi dan dibawa ke Ibu Pejabat Polis Daerah (IPD) Dang Wangi, Kuala Lumpur untuk membantu siasatan berhubung pengibaran bendera Sang Saka Malaya.

Dalam pada itu, Menteri Penerangan dan Komunikasi Datuk Seri Ahmad Shabery Cheek tidak menolak kemungkinan gelaran Sasterawan Negara yang diberikan kepada Samad boleh ditarik balik berhubung insiden kibaran bendera Sang Saka Malaya pada malam sambutan ulang tahun kemerdekaan Jumaat lalu.

Bagaimanapun, orang ramai termasuk pemimpin politik dan aktivis menyelar tindakan pihak polis tersebut sebagai tidak beradab dan menghormati seorang yang berusia dengan menahannya lewat pagi.

Sasterawan Negara itu disoal siasat selama hampir dua jam selepas tiga anggota polis mengambilnya di rumah berhubung insiden pada malam ambang kemerdekaan ke-56 di Dataran Merdeka, Kuala Lumpur.

Samad disiasat mengikut Seksyen 4 Akta Hasutan dan Seksyen 505, Kanun Keseksaan. – 5 September, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/perkasa-desak-samad-said-pulangkan-anugerah-sasterawan-negara>

